

AKHBAR : SINAR HARIAN
MUKA SURAT : 7
RUANGAN : NASIONAL

24/5/25 Sabtu m/s 7 Sinar Harian Nasional

KKM gerakkan 200 petugas kesihatan

KUALA LUMPUR - Kementerian Kesihatan (KKM) menggerakkan hampir 200 petugas kesihatan bagi memperkukuh kesiapsiagaan perubatan semasa Sidang Kemuncak ASEAN ke-46 dan sidang berkaitan di sini.

Langkah ini melibatkan pengoperasian bilik rawatan di Pusat Konvensyen Kuala Lumpur (KLCC) yang menjadi lokasi utama sidang kemuncak itu, hotel-hotel penginapan rasmi delegasi serta pemantauan di Lapangan Terbang Antarabangsa Kuala Lumpur (KLIA).

Pengarah Kesihatan Negeri bagi Kuala Lumpur dan Putrajaya, Dr Nor'Aishah Abu Bakar berkata, sebanyak empat bilik rawatan beroperasi di KLCC termasuk satu bilik khas yang disediakan khusus untuk ketua-ketua negara.

"Bilik rawatan turut disediakan di hotel-hotel penginapan bagi membolehkan para delegasi mendapatkan rawatan segera sekiranya menghadapi

masalah kesihatan di luar waktu persidangan," katanya.

Dr Nor'Aishah berkata, pasukan kesihatan terdiri daripada pakar perubatan kecemasan dan traumatologi, pegawai perubatan serta paramedik terlatih bersedia di setiap lokasi bagi menangani sebarang situasi kritikal dengan pantas dan cekap.

Sebagai tambahan, empat ambulans turut ditempatkan sepanjang acara berlangsung di KLCC bagi memastikan pesakit yang memerlukan rawatan lanjutan dapat dihantar ke hospital tanpa kelewatan.

"KKM turut menugaskan pasukan perubatan untuk berada bersama setiap ketua negara yang hadir bagi memastikan bantuan perubatan dapat segera diberikan sekiranya berlaku kecemasan," katanya.

Selain aspek perubatan, beliau berkata, KKM memainkan peranan penting dalam memastikan aspek keselamatan dan kualiti makanan kepada para delegasi terjaga. - Bernama